

每週經課朗誦經文 (巴克禮漢羅/教羅) 2011/12/04

共同經課-1 以賽亞書第四十章一節 ~ 十一節

1 Lín ê 上帝講，Lín tiòh 安慰，安慰我 ê 百姓。 2 Tiòh 對耶路撒冷講好話，koh 報伊知，伊 ê 交戰已經盡，伊 ê 罪過已經赦；伊爲 tiòh 伊一切 ê 罪，tùi 耶和華 ê 手加倍受刑罰。 3 有聲叫講，Tī 曠野備辦耶和華 ê 路，tī 沙漠 ê 地，修平咱 ê 上帝 ê 大路。 4 Chiah-ê 山谷 lóng beh thūn hō伊 tīⁿ，大細 ê 山頭 lóng beh 掘 hō伊低；彎 oat-ê，beh 改 hō伊直，坎坷 ê，beh 修 hō伊平。 5 耶和華 ê 榮光的確顯現，凡若有血氣 ê beh long 看見；因爲這是耶和華親嘴講 ê。 6 有聲講，你 tiòh 叫，伊講，我 tiòh 叫甚麼？見若有血氣 ê long 親像草，伊 ê 榮光 lóng 親像山裡 ê 花；草會乾，花會謝； 7 因爲耶和華 ê 氣吹 tī 伊 ê 頂面；百姓真正是草。 8 草會乾，花會謝；獨獨咱 ê 上帝 ê 話的確永遠 tī-teh。 9 報好消息 hō錫安 ê ah，你 tiòh 上高山；報好消息 hō耶路撒冷 ê ah，你 tiòh 盡力出你 ê 聲；tiòh 出聲，m̄免驚；對猶大 ê 城講，看 ah，lín ê 上帝。 10 看 ah，主耶和華 beh 親像大權能 ê 臨到，祂 ê 手的確爲祂掌權；看 ah，祂 ê 賞賜 tī 祂 hia，祂 ê 報答亦 tī 祂 ê 面前。 11 祂 beh 親像牧者顧伊 ê 羊群，祂 beh 用手 âⁿ-oá 羊 á-kiáⁿ，抱伊 tī 胸前，慢慢 chhoā hiah-ê hō羊 á suh-lin-ê。

共同經課-2 詩篇八十五篇一節 ~ 二節，八節 ~ 十三節

1 耶和華 ah，你已經施恩 tī 你 ê 地，雅各受掠 ê 人，你救伊 tò 來。 2 你赦免你 ê 百姓 ê 罪惡，你遮蓋 in 一切 ê 罪過。[Sè-lah] 8 我願聽全能 ê 耶和華所 beh 講 ê；因爲伊 beh tùi 伊 ê 百姓，kap 伊聖 ê 百姓，講平安；總是 in m̄-thang koh 去 lām-sám 行。 9 伊 ê 救恩實在近 tī 驚畏伊 ê 人；Hō榮光 tiàm tī 咱 ê 境內。 10 慈愛 kap 真實相 tú-tiòh；公義 kap 平安相 chim 嘴。 11 真實 tùi 地裡發生，公義 tùi 天看落來。 12 耶和華 beh 賞賜好物，咱 ê 土地 beh 出伊 ê 土產。 13 公義 beh 行 tī 伊 ê 頭前，Hō伊 ê 腳跡成做 lō。

共同經課-3 彼得後書三章八節 ~ 十五節

8 所疼 ê 兄弟 ah，有一項 lín m̄-thang boē 記得，就是主看一日親像一千年，一千年親像一日。 9 主無 iân-chhiân tī 所應允，親像人有 ê 看做 iân-chhiân ê，就是寬容 lín，m̄-ài 有人沉淪，是 ài 人 lóng 反悔。 10 但是主 ê 日 beh 到親像賊，hit 日 hiah-ê 天 beh 有大聲廢棄，hiah-ê 原質受燒來消滅，地 kap 其中所有 ê 物也燒 lio 去。 11 萬物既然 beh án-ni 消滅，就 lín tī 聖 kap 敬虔 tiòh 做甚麼號 ê 人， 12 來 òng 望續催逼上帝 ê 日到；爲 tiòh án-ni，chiah-ê 天會 hō火消滅，原質受燒，就熔去？ 13 但是照伊所應允，咱 òng 望新 ê 天新 ê 地，義 tiàm tī in 中間。 14 所以所疼 ê 兄弟 ah，lín 既然 òng 望 chiah-ê，tiòh 懇勤 hō lín 無 lâ-sám，無瑕疵安然見 tiòh 伊。 15 Koh tiòh 看咱 ê 主 ê 寬容做拯救 ê 因由；親像阮所疼 ê 兄弟保羅，照所賞賜伊 ê 智慧，也 bat 寫 phoe hō lín。

共同經課-4 馬可福音一章一節 ~ 八節

1 上帝 ê Kiáⁿ 耶穌基督福音 ê 起頭。 2 親像 tī 先知以賽亞 ê 冊所記載講，我差我 ê 使者 tī 你 ê 面前，來修整你 ê 路； 3 有 teh 叫 tī 曠野 ê，伊 ê 聲講，Tiòh 備辦主 ê 路，修直伊 ê 小路。 4 約翰來 tī 曠野行洗禮，傳反悔 ê 洗禮，hō人得 tiòh 赦罪。 5 Thong 猶太地 kap 耶路撒冷 ê 眾人 lóng 出來就近伊，認 in ê 罪，tī 約旦河 tùi 伊受洗禮。 6 Chit-ê 約翰穿駱駝毛，腰 hà 皮帶，食草蟲 kap 山野 ê 蜜。 7 伊傳講，有一個比我 khah 有權能 ê tè 尾我來；就屈落來 tháu 伊 ê 鞋帶，我也 boē 堪得。 8 我 bat 用水 kā lín 行洗禮，伊 beh 用聖神 kā lín 洗。